

Inuussutissarsiutigalugu piniarnermut allagartaq maanna atuuttumut taarsiullugu inuussutissarsiutigalugu aalisarnermut allagartap, inuussutissarsiutigalugulu piniarnermut allagartap immikkoortilersinnissai pillugu apeqquteqaat aallaavigalugu oqallisissiasatut siunnersuut.

(Inatsisartuni ilaasortaq Aqqalu C. Jerimiassen, Atassut)

Akissuteqaat

(Aalisarnermut Piniarnermullu Naalakkersuisoq)

Suliarineqarnera

Naalakkersuisut siunnersuuteqartoq Aqqalu C. Jerimiassen, Atassut, inuussutissarsiutigalugu piniarnermut allagartaq maanna atuuttumut taarsiullugu inuussutissarsiutigalugu aalisarnermut allagartap, inuussutissarsiutigalugulu piniarnermut allagartap immikkoortilersinnissai pillugu apeqquteqaat aallaavigalugu oqallisissiasatut siunnersuut pillugu qujaffigaat.

Akissuteqaammi uani inatsit nutaaq upernaq Inatsisartut akuersissutigisaat kiisalu nalunaarutit atuuttut oqallisigisassamut attuumassuteqartut tunngavigineqassapput.

Nunatsinni piniarnek, aallaaniarnek aalisarnerlu ukiup qanoq ilinerani piniakkat takkusimaarneri apeqqutaatillugit piniarnek aalisarnerlu aallunneqartarput. Taamaattumik ingammik piniartut aalisartullu umiatsiaararsortut pineqartut akulerullugit sammisarisarpaat. Tamannalu Naalakkersuisut ippinnartoqartinngilaat.

Inuussutissarsiutigalugu piniarsinnaanermut allagartat aammalu aalisarsinnaanermut akuersissutit inatsisit assigiinningsut marluk tunngavigalugit suliarineqartarput taamaalillutillu allaffissornikkut immikkoortinneqareerlutik, kommuneni allaffissornikkut immikkoornerat ilanngullugu.

Naalakkersuisut isumaqarput tunngaviumik aqutsinikkut allannguisoqartariaqanngitsoq siunertaanngitsumik pisariaqanngitsumillu killilersuisoqaqqunagu aammalu allaffissornerujussuarmik pilersitsisoqaqqunagu.

Maannami aalisartut piniartullu isertitaat aalisarnermeersut piniarnermeersullu immikkoortillugit nalunaarsorneqarnek ajorput, periusarlu allanngortinneqassappat inatsisitugit allanngingaatsiaqqaarluni tamanna pisinnaavoq, pisariaqanngitsumillu allaffissornerunermik kinguneqassalluni, tamannalu Naalakkersuisut kissaatiginngilaat.

Taamatuttaaq aningaasatigut isertitat tunngavigalugit aalisartutut piniartutullu ingerlasut immikkoortinneqartalissappata, aalisartutut piniartutut inuuniutillit pisariaqanngitsumik piniagassatigut killilersuiffigineqarsinnaalernissaat aarlerinarpoq.

Naalakkersuisut isumaqarput piniakkanik killilersukkanik erseqqarinnerusumik agguaassisalertoqassappat tamanna kommuniniit aallaaveqartariaqartoq, soorlu assersutigalugu kommunini ileqqoreqqusaliornikkut killilersukkat aqunneqarneri sinaakkusersorneqarnerusinnaammata.

Naalakkersuisut taamatut oqaaseqarlutik angusaqarfiulluurtumik aamma oqallilluarnissamut qilanaarput.